

BOSNA I HERCEGOVINA  
Federacija Bosne i Hercegovine  
UNSKO-SANSKI KANTON  
Skupština



BOSNIA AND HERZEGOVINA  
Federation of Bosnia and Herzegovina  
UNA - SANA CANTON  
Assembly

# **S t e n o g r a m**

sa XXX sjednice Skupštine  
Unsko – sanskog kantona koja je održana 18. decembra 2012. godine

## **Poslanička pitanja**

Bihać, 18. decembar 2012 godine

**Predsjedavajući Skupštine Unsko – sanskog kantona, Admir Hadžipašić:**

Molim poslanike da se jave. Gospodin Sead Kadić, poslaničko pitanje.

**Poslanik Sead Kadić:**

Ja vas sve skupa selamim i pozdravljam.

Imam dva poslanička pitanja. Gospodine Predsjedavajući, ja Vas molim ako vrijeme od tri minute, pola minute profulam, da mi halalite i pustite da završim svoje pitanje.

Prvo pitanje je slijedeće:

Još 2003 godine Francuska firma „La Farž“ je iskazala interes za istraživanje, eksploataciju i preradu gipsa na području Orašca i Kulen Vakufa u općini Bihać. Obećavali su kule i gradove, velike investicije, cirka 30 miliona i nova upošljavanja. Sve nam se to činilo izuzetno privlačno, te je podrška ovom projektu data od strane kantona i općine Bihać. Svakako, najveća podrška što su pokazali na javnim raspravama uslijedila je od strane lokalnog stanovništva Orašca i Kulen Vakufa, što je i zasluga Stranke Demokratske Akcije, koja je pripremala stanovništvo u cilju podrške projektu, ovom zapošljavanu i boljem životu. Paralelno sa ovim projektom vodile su se rasprave o proglašenju „Nacionalnog parka Una“ koji graniči sa ležištem gipsa, a u nacrtu granice nacionalnog parka zahvatale su i samo ležište gipsa, te je uslijedio zastoj na realizaciji projekta gipsa od cirka tri godine dok se ne definišu tačne granice nacionalnog parka. Da bi se projekat gipsa pomjerio sa mrtve tačke trebalo je donijeti odgovarajuće odluke o izmjenama granica nacionalnog parka. Takav zahtjev od strane Federalnog ministarstva prostornog uređenja u Vladi kantona bio je nekoliko mjeseci. Dok za isti nisam čuo i na moju inicijativu je Vlada i Skupština kantona donijela odluku o izmjenama granica nacionalnog parka, koju je prihvatio Federalni parlament. Nakon donošenja odluke od strane Parlamenta o izmjenama granice nacionalnog parka, uslijedilo je izdavanje rješenja od 22.10.2007 godine od strane Federalnog ministarstva prostornog uređenja, kojim se daje urbanistička saglasnost za geološko istraživanje gipsa na području Orašca i Kulen Vakufa. Federalno ministarstvo energije, rudarstva i industrije Mostar, po primljenom zahtjevu za izdavanje odobrenja za geološka istraživanja zakazalo je javnu raspravu dana 13.12.2007 godine u Bihaću, nakon čega je izdato rješenje broj: UP 06 – 18 – 84 / 07 od 26.12.2007 godine, kojim se privrednom društvu La Farž – Adria gips d.o.o. Bihać odobrava geološko istraživanje gipsa na području Orašca i Kulen Vakufa. Površina istražnog polja iznosila je milion i 680 hiljada i 650 metara kvadratnih, ili 168 hektara, što je izuzetno velika površina. Na javnoj raspravi puna podrška izdavanju odobrenja za geološka istraživanja data je od strane kantona, općina Bihać i mjesnih zajednica Orašac i Kulen Vakuf, što je i evidentno u zapisniku sa javne rasprave. Predstavnici firme „La Farž“ obećali su ministarstvu privrede da će po dobijanju odobrenja za geološka istraživanja imenovati kontakt osobu i otvoriti kancelariju u Bihaću u Domu Kulture, ulica 502. Viteške brigade broj 11, gdje su i sudski registrirani. Što do danas nisu učinili. Nakon izvršenih geoloških bušenja, urađen je elaborat o klasifikaciji i kategorizaciji proračuna rezerve sirovog gipsa na području Orašca, Kulen Vakufa i isti je revidovan u Federalnom ministarstvu energije, rudarstva i industrije Mostar, nakon čega je izdato rješenje broj: 0618 – 6 / 09 od 21.04.2009 godine, kojim se potvrđuju geološke rezerve i kvalitet mineralne sirovine sirovog gipsa, ukupne količine 26 miliona 749

hiljada i 202 tone. Nakon potvrđenih rezervi privredno društvo La Farž – Adria gips d.o.o. Bihać u obavezi je da pribavi urbanističku saglasnost za eksploataciju gipsa, a nakon toga i odobrenje za eksploataciju gipsa. Urbanističkoj saglasnosti predviđi izdavanje više pred-saglasnosti, kao što su saglasnost općine Bihać, prethodna vodna saglasnost, saglasnost Elektroprenosa, saglasnost Elektrodistribucije, BH – Telecoma, Direkcije puteva, Poljoprivredno – šumarska, Zavoda za zaštitu kulturno – istorijskih spomenika i okolinska dozvola. Koliko je meni poznato firma „La Farž“ pribavila je samo okolinsku dozvolu od Federalnog ministarstva okoliša i turizma, a za ostale saglasnosti nisu podnijeli ni zahtjev. Stiče se dojam da firma „La Farž“ namjerno odugovlači pribavljanje potrebne dokumentacije, a ostvarili su zacrtani cilj, rezervisali su ogroman prostor, a nama su ruke vezane. Gospodine ministre privrede, ne vidim nikakvih zakonskih smetnji da se raspiše međunarodni tender za dodjelu koncesije za eksploataciju gipsa na području na kome je izvršeno geološko istraživanje. Pa bujrum, ko ponudi najbolje uvjete, njima dodijeliti koncesiju. Pa ako to bude neka druga firma, obvezati je da namiri troškove firme „La Farž“ u dosadašnjem istraživanju. Na bazi dosadašnjih istržnih radova postoji dosta parametara za izradu elaborata o ekonomskoj opravdanosti dodjele koncesija koji prethodi izradi tenderske dokumentacije. Samo ne znam da li stručna lica na koja se oslanjate u ministarstvu mogu i znaju izraditi elaborat o ekonomskoj opravdanosti. Uostalom, čini mi se da je postojanje ugovora o koncesiji i uslov za dobijanje dozvole za eksploataciju po Zakonu o rudarstvu. Molim da me pismeno obavijestite da li su poduzeti odgovarajući koraci ka realizaciji projekta eksploatacije i prerade gipsa? Jer to od vas očekuju građani Ljutočke doline. Uostalom, ovoj novoj kantonalnoj vlasti su puna usta o privlačenju stranih investicija, pa da vidimo koliko ste sposobni da to realizirate.

Moje drugo poslaničko pitanje odnosi se na...

( PREKINUTO POSLANIČKO PITANJE )

**Predsjedavajući Skupštine Unsko – sanskog kantona, Admir Hadžipašić:**

Isteklo Vam je vrijeme gospodine Kadiću. Već šest minuta.

**Poslanik Sead Kadić:**

Pa ja bih vas zamolio, ja sam vas na početku zamolio da mi dozvolite da imam pravo poslanička pitanja da iznesem. I drugo poslaničko pitanje mislim da je vrlo bitno.

**Predsjedavajući Skupštine Unsko – sanskog kantona, Admir Hadžipašić:**

Ali samo kratko, molim Vas. Već šest minuta ste.

**Poslanik Sead Kadić:**

Ja se zahvaljujem našem Predsjedavajućem. Radi se o mom poslaničkom pitanju, ja ću pokušati malo skratiti, ja ću ovo u pisanoj formi dostaviti ovdje stručnoj službi. Tražim odgovor na ovo pitanje:

Završna faza kod sređivanja i zaštite arhivske građe kod svakog pravnog lica, pa tako i kod Vlade USK-a je digitalizacija i elektronsko pohranjivanje. Arhivska građa Vlade, svih ministarstava i Skupštine, se nalazi u jednom objektu u kasarni Orljani, gdje najveći dio prostora koristi MUP i obezbjeđenje vrši MUP USK-a, specijalne jedinice. Tu se nalazi arhiva MUP-a. U jednoj zgradi je depo arhiva USK-a. Bez najave, naravno dobijanja saglasnosti za spisak lica koja mogu ući tamo, niko i nema pristup.

- Pitam ko je odobrio ulazak radnika iz RS-a u prostor koji obezbjeđuje MUP i gdje se nalazi arhiva cijelog kantona?

Arhivska građa koja je smještena u depou Orljani, kao i po kancelarijama Vlade, je u nesređenom stanju. Uglavnom nemaju liste kategorije sa rokovima čuvanja na osnovu kojih bi se mogla ta arhiva srediti. Jer nije urađeno ni propisano koliko se vremenski čuva koji spisak, ili šta se to ustvari čuva. Sad kad je angažovana firma iz Republike Srbske, krenulo se u izradu tih lista, kategorija, a angažovana lica iz RS-a su već u depou. Pregledaju šta hoće, skeniraju i naravno zadržavaju za sebe primjerak svakog akta za koji smatraju da bi im mogao poslužiti.

( PREKINUTO POSLANIČKO PITANJE )

**Predsjedavajući Skupštine Unsko – sanskog kantona, Admir Hadžipašić:**

Privodite kraju gospodine Kadiću. Znači, možete dostaviti i u pisanoj formi pitanje.

**Poslanik Sead Kadić:**

Dobro. Ja znam da Vas ovo ne interesuje, ali možda interesuje nekog ovdje u Sali. Radi se o slijedećem, znači angažovana je firma za digitalizaciju podataka, koja se zove firma „Securiti Sector A ED ES“ Iz Banja Luke. I koja je kažu blizak saradnik Milorada Dodika. Naime, ranije je bilo urađeno da ovu dokumentaciju arhivira Arhiv Unsko – sanskog kantona po cijeni 20 hiljada mraka. Međutim, ovo je dodjeljeno toj firmi po cijeni od 300 hiljada konvertibilnih maraka. I ja pitam, znači moje pitanje na kraju glasi:

- Da li je proveden zakoniti tender prilikom dodjele ovog posla? Da li su poduzete kakve mjere zaštite povjeriocu dokumenata iz arhiva?

I ja molim odgovor na pisano pitanje. Ja ovaj materijal dostavljam ovdje Skupštini pred kamerama i pred uvažanim kolegama vijećnicima.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se. Poslaničko pitanje, gospođa Elvira Abdić Jelenović.

**Poslanica Elvira Abdić Jelenović:**

Pozdravljam sve nazočne.

Za danas imam dva izaslanička pitanja. Upućujem ga Vladi Unsko – sanskog kantona da isto proslijedi nadležnim ministarstvima u Federaciji i Fondu za zaštitu okoliša.

U jednom od odgovora na izaslaničko pitanje postavljeno u Domu Naroda stoji da je plaća direktora Nacionalnog parka Una 2 tisuće i 650 maraka mjesečno. Da je naknada predsjedniku nadzornog odbora Nacionalnog parka 830 maraka mjesečno. A članovima nadzornog odbora 660 maraka mjesečno. U izvještajnim materijalima koje dobijamo u Domu Naroda, nisam nigdje zapazila izvješće o poslovanju društva Nacionalnog parka Una. Pa koristim priliku da postavim nekoliko pitanja:

- U kojoj fazi se nalazi projekat Nacionalnog parka Una?
- Koliko je ukupno izdvojeno sredstava iz budžeta Federacije BiH za Nacionalni park od dana donošenja Zakona o Nacionalnom parku Una do danas?
- U čijoj nadležnosti je razmatranje izvješća o radu i program rada poduzeća Nacionalnog parka Una i ko su članovi nadzornog odbora?

Moje drugo pitanje upućujem Vladi Unsko – sanskog kantona.

Na prostoru za oglašavanje duž magistralne ceste na Unsko – sanskom kantonu redovito se ističu prigodne čestitke upućene građanima od, kako to stoji, Premijera Unsko – sanskog kantona, Hamdije Lipovače. Kako je na čestitkama naznačeno samo jedno lice, stiče se dojam da su reklamni plakati promidžba funkcije Premijera, a ne Vlade Unsko – sanskog kantona, čime se ostavlja prostor svakom ministru da u svoje ime upućuje iste čestitke, što se u proteklom periodu i događalo. Obzirom da sve to pada na teret budžeta kantona, upućujem nekoliko pitanja:

- Koliko se iz budžeta Unsko – sanskog kantona u periodu od 01.01.2011. do danas izdvojilo sredstava za izradu reklamnih plakata, njihovu ugradbi i naknadu za korištenje panoa?
- Koliko se sredstava iz budžeta kantona u istom periodu izdvojilo za reklame na televiziji, u pisanim i elektronskim medijima?
- Zašto se u potpisu prigodnih čestitki umjesto Premijer Hamdija Lipovača, ne stoji Vlada Unsko – sanskog kantona?

Zahvaljujem.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se. Poslaničko pitanje ima gospodin Mirvet Beganović.

**Poslanik Mirvet Beganović:**

Poštovane dame i gospodo, gospodine Predsjedavajući, podpredsjednici, Sekretaru, ministri iz Vlade, predstavnici medija, međunarodnih organizacija, kolegice i kolege, koristim priliku da vas srdačno pozdravim, pošto prvi put izlazim.

Ja imam danas dva poslanička pitanja.

Moje prvo poslaničko pitanje upućeno je Vladi Unsko – sanskog kantona i nadležnim vladama u Federaciji. A ono glasi:

- Šta je poduzeto i šta se poduzima sa aspekta rješavanja izvoza poljoprivrednih proizvoda u okruženje, to jest šta će se desiti ulaskom u Evropsku Uniju?

Evo Hrvatske, gdje već imamo probleme. Imam informaciju, vraćeno je 150 tona mlijeka. I bio je jedan sastanak u Sarajevu gdje su bili predstavnici međunarodnih organizacija, predstavnici Hrvatske i predstavnici BiH, gdje se jednostavno sad prebacuje odgovornost između inspekcije, ministarstva i ostalih, jer nije se spremno za izvoz poljoprivrednih proizvoda. Imaćemo jedan strahovit problem. Pravili smo strategiju razvoja poljoprivrede kao naše strateške grane i ukoliko ne pripremimo se za taj teren, mislim da će biti problem. Znači pitanje je konkretno, šta je poduzeto, šta se poduzima da se prevaziđu ti problemi, da se adekvatno pripremimo za vrijeme koje dolazi? Jer evo, samo tri farme u BiH imaju certifikat da mogu svoje proizvode izvoziti u Evropsku Uniju. A imamo velike farme na našem kantonu gdje niko nije njima pristupio i rekao šta moraju da naprave da ispune uvjete. Prema tome, veoma bitno i značajno pitanje.

Moje drugo pitanje je pitanje Federalnoj direkciji za ceste, Općini Cazin i Javnoj Ustanovi Stambeno – komunalni fond Cazin.

Ono glasi:

- Kada će biti popravljena i stavljena u funkciju javna rasvjeta u mjesnoj zajednici Pećigrad, kraj magistralnog puta M – 4 – 2, koja je uništena prilikom rekonstrukcije, radova, popravka magistralnog puta M – 4 – 2?

Znači, prilikom izvođenja radova izvođač je uništio rasvjetu koja je bila sva ispravna. Mjesna zajednica Pećigrad izdvojila je preko 20 hiljada maraka da ta rasvjeta bude u funkciji. I to je jedina rasvjeta ja vjerujem na kantonu, koja uz magistralni put ne radi već dvije godine. Općina Cazin i Komunalni fond, šta oni planiraju poduzeti da se to stavi u funkciju? Jer stvarno je sramota da jedan centar jedne mjesne zajednice koja je gusto naseljena, gdje svakodnevno preko 300 djece ide u školu, gdje ima značajnih problema, na žalost je u mraku i ne poduzima se ništa. Znači moje pitanje je konkretno Direkciji za ceste u Općini Cazin i nadležnoj Javnoj Ustanovi Stambeno – komunalni fond. Šta oni prema direkciji i oni koji prate i finansiraju rasvjetu će poduzeti da se to napokon stavi u funkciju? Već je velika zamjerka. Ja mislim da je stvarno neopravdano. Dvije godine da ne radi rasvjeta uz magistralni put, koja je postojala prije nego što su mnogi imali javne rasvjete. Ta jedna rasvjeta je napravljena prije rata, gdje su građani finansirali i poslije rata su uložili svojih sredstava preko 20 hiljada maraka.

Hvala lijepo.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se gospodinu Beganoviću. Gospodin Nijaz Hušić, poslaničko pitanje.

**Poslanik Nijaz Hušić:**

Gospodine Predsjedavajući, uvaženo predsjedništvo, ministri u Vladi kantona, kolegice i kolege ja prije svega moram ovdje zahvaliti se kolegama poslanicima koji su na prošloj sjednici odrekli se dijela svojih primanja u korist liječenja za Muhameda Vilića koji je trenutno u Njemačkoj na tom liječenju. Ja vam se još jednom u njegovo ime i u ime te prodice zahvaljujem.

Ono što želim reći danas, je da sam ponovo nezadovoljan naravno odgovorom, koji sam dobio od resornog ministra, gospodina Topčagića, na svoje poslaničko pitanje. Iako nam je ministar prošli put svima ovdje nama rekao da je spisak korisnika socijalne pomoći negdje ne putu. Međutim, taj spisak evo ni danas nije došao. Što znači da nas je još jednom obmanuo. Međutim, danas smo dobili odgovor na nekoliko stranica u kojima se između ostalih stvari iznose određene kvalifikacije ili određena tumačenja oko toga kako se to ne može dostaviti. Ja samo želim ovdje podsjetiti poslanike, ako se sjećaju, na početku ovog mandata jedan od Skupštinskih zastupnika je tražio isto tako jednu evidenciju iz Fonda za stambeno zbrinjavanje boraca, dakle ko su korisnici nepovratnih sredstava i taj spisak je ovdje uredno dostavljen. Što još jednom govori o tome da u ovom ministarstvu zaista određene stvari koje se dešavaju u proteklom periodu, nisu na čast prije svega resornom ministru. Međutim, ministar me izazvao u ovom svom odgovoru, dakle kvalificirajući me kao društveno ne prihvatljivu, da provodim društveno ne prihvatljive aktivnosti, da širim socijalnu netolerantnost, da podrivam rad ministarstva i onda shodno tome svemu bi možda na današnjoj sjednici trebao biti uhapšen. Evo ministra ovdje, to su tako teške kvalifikacije. Umjesto jednog banalnog odgovora koji sam trebao dobiti na ovo svoje poslaničko pitanje. Međutim, isto tako ponukan ovim odgovorom, želim ministru još jednom reći zašto sam to pitanje postavio. Dijete za koje ste vi prošli put ovdje izdvojili negdje oko hiljadu i 500 konvertibilnih maraka, kao zastupnici, njegov otac koji je dobrovoljac u proteklom ratu je podnio zahtjev u sedmom mjesecu. Dijete mu naime ima karcinom i ostalo je bez vida. Podnio je u sedmom mjesecu zahtjev za jednokratnu novčanu pomoć tom ministarstvu, iako nikad to svoje pravo nije ostvarivao ni po kom osnovu. I onda kad sam to prošli put govorio, njemu su misionari iz A SDA došli kući i rekli da pređe u stranku da bi dobio ta sredstva. Tek na drugi zahtjev koji je podnešen u okviru jedne šire akcije, ministar se odvažio i dao hiljadu maraka i na tih hiljadu maraka koje je prebacio neki dan, otac tog dijetete me zamolio da ta sredstva vratim resornom ministru. Ja sam rekao da to vratiti neću, jer to su sredstva koja njega pripadaju po zakonu. Čovjek koji dvadeset godina, dakle koji sve i dan rata ima, nije dobio nikad ništa od tog ministarstva i na jedan takav način je bio ucjenjivan. To je razlog zašto sam tražio spisak svih tih ljudi koji su dobili. A možete zamisliti koliko je takvih ljudi u ovom sistemu, u ovom ministarstvu ostalo bez naknade. Zašto? Zato što su sredstva potrošena, ponovo tvrdim, u izborima. Sredstva su potrošena iz budžeta u potpunosti u stopostotnom iznosu, a ova su uplaćena tek nakon donošenja rebalansa. Jer su sva sredstva utrošena na kupovanje izbora. Žalosno je da od jednog ministra koji moralizira, koji je između ostalih stvari i Imam, koji bi trebao trebao nas malo učiti moralu, da na ovakav jedan način se odnosi prije svega prema boračkim kategorijama.

Zahvaljujem.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se gospodinu Hušiću. Gospodin Ismet Dolić, poslaničko pitanje.

**Poslanik Ismet Dolić:**

Poštovani Predsjedavajući, zamjenici Predsjedavajućeg, Sekretaru, kolegice i kolege zastupnici, ministri, članovi Vlade, dragi gosti, slušatelji i gledatelji Kantonalne Radio – televizije, dobar dan i lijep pozdrav.

Ja za danas imam dva zastupnička pitanja.

Prvo je naslovljeno na ministarstvo unutarnjih poslova, odnosno na ministra. Ono glasi:

- Od kada se vrši uplata beneficiranog radnog staža za djelatnike ministarstva unutarnjih poslova i na osnovu kojeg dokumenta?
- Koliko je uplaćeno sredstava od 1997 do danas?
- Također, interesira me da li je istina da je u ranijem periodu MIO, PIO pokušavao vraćati ova sredstva kantonu jer nisu imali ugovor sa ministarstvom i nisu imali osnovu za knjiženje?

Hvala lijepo.

I moje drugo pitanje je naslovljeno na ministarstvo pravosuđa i uprave.

Ono ide od prilike ovako:

Ovih dana obratilo mi se nekoliko državnih službenika i namještenika općinskog organa uprave iz Velike Kladaše i zamolilo da provjerim u vašem ministarstvu propisani način za primopredaju arhive i dokumentacije povodom promjena i primopredaje vlasti u Velikoj Kladaši. Nova vladajuća elita je formirala petoročlanu komisiju u sastavu: gospodin Sulejman Ćufurović, Husein Bataković, Ibrahim Pehlić, Ante Butorac i Enes Halilović su iz Velike Kladaše. Po kazivanju spomenutih uposlenika općine, nitko od ove komisije nije uposlenik organa uprave, jer su prva četvorica već odavno u mirovini. Što ih ne sprječava da provode po cijele dane u prostorijama općine. Oni imaju zadatak da vrše provjeru i sadržaj arhive i dokumentacije pojedinih službi organa uprave. Tako da istu izuzimaju i kopiraju za svoje ili tuđe privatne zbirke i naravno odnose u nepoznatom pravcu. A navodno, neki se vide da često prelaze državnu granicu u Maljevcu. U strahu za svoja radna mjesta, niko ne smije da pita za zakonitosti rada ove komisije, a ipak kod nekih postoji strah da se takva arhiva i podaci koji se dobiju uvidom u istu mogu zlouporabiti na štetu svih građana Velike Kladaše. Iz tih razloga njih, a i mene osobno, interesira po kojim propisima se formira ovakva ili ovakve komisije koje mogu sa sastavom 80%-tno od umirovljenika i civilnih osoba koje nemaju nikakve kompetencije i profesionalne reference za ovaj posao. Jer bi ovakve komisije trebale biti najmanje mješovitog sastava, gdje bi svakako u njihovo članstvo mogli ući aktivni uposlenici organa uprave koji imaju položen stručni ispit za rukovanje sa arhivom i drugom dokumentacijom, kao i datu zakletvu za državnog službenika ili namještenika. U isto vrijeme zamolio bih Kantonalnog upravnog inspektora da provjeri ove navode i utvrdi da li je rad ove komisije u skladu sa pozitivnim materijalnim propisima, ili se radi o nečemu drugom.

Zahvaljujem.



**Predsjedavajući Skupštine Unsko – sanskog kantona, Admir Hadžipašić:**

Zahvaljujem se. Gospodin Asim Kamber, poslaničko pitanje.

**Poslanik Asim Kamber:**

Ja bih htio uložiti svoj prigovor direktoru cesta, gospodinu Amelu Alagiću. Naime, mi ćemo morati izgleda iz doline Sane staviti na auta one grtalice, jer još uvijek nije ništa prošlo. Evo kolega mi govori iz Sanskog Mosta također. I zaista bih molio da se počne cesta održavati. Od kad je došao ovaj Premijerov kum, mi zaista imamo problema.

Direkciji za cest usput i postavljam pitanje:

- Tražim informaciju o svim investicijama Direkcije za ceste, od kada je na njenom čelu direktor Amel Alagić.

S obzirom da mi to ne dobivamo. Ova Skupština ništa o tome ne zna.

- Tražim dakle tendere, janve pozive, sve navedene poslove, kome, kako i kad će biti završeni?
- Ko je sve zaposlen u Direkciji za ceste USK-a nakon što je smjenjen Narudin Osmanović, bivši direktor i imenovan Amel Alagić, kum Premijera Hamdije Lipovače?
- Ja tražim da se dostavi konkurs o zapošljavanju i akta o provedenoj proceduri.

Isto tako imam drugo zastupničko pitanje. Ja sam naime dobio jedno pismo koje mi je prošli put uručeno ovdje u koverti od jednog Bišćanina koji ne koristi M TEL, ovo što ministri naši neki preferiraju. I onda sam nazvao taj telefon. On je tu naveo određene navode vezano za našeg Premijera. Ja u to ne mogu vjerovati. Znajući i poštenje. Nemojte se smijati. I onda slijedom, nazvao sam čovjeka, čovjek mi se predstavio i rekao da će doći ovdje ako treba da to ponovi. I onda ću ja postaviti određena pitanja vezano za njegove navode.

Premijeru Vlade, Hamdiji Lipovači:

Gospodine Premijeru, za kratko vrijeme u poslijeratnom periodu prema nezvaničnim informacijama Vi ste postali vlasnikom i suvlasnikom kuće na moru, apartmana u Baškim vodama, apartmana u Selinama kod Posedarja, zemljišta u Orljanima pored Une, zemljišta sa kućom u vikend naselju Dobrenica, zemljišta sa kućom pored Une u naselju Privilica kod mosta, zemljišta u Kulen Vakufu pored Une, hotela Empirijum tu ste suvlasnik, valjda je rođak i stana u Zagrebu.

- Dakle, ja tražim ugovore o kupnji i izvor i način finansiranja.

S obzirom da Premijer, ja sam dobio izvode iz banke gdje Premijer ima račun, on nikada ne diže. Praktično godišnje nekoliko puta i to samo to transferira u devizna sredstva. Odakle je ovo platio ako ne troši sredstva sa vlastitog računa? I je li ovo istina? Ja ne mogu vjerovati da je ovo istina. Da je sad Premijer, ja bi mu dao ime. Nije čovjek ovdje. Volio bih zato da je ovdje da mu dam podatke o čovjeku da ne ispadne da ja ovdje pričam na pamet. Ja bih zaista zamolio Premijera da mi da odgovor na ovo pitanje.

I zašto nisam dobio? Ministar finansija mi je odgovorio, zašto to kolegama ovdje nije podjeljeno? Mi smo prošli put usvojili rebalans. Mi smo slagali javnost dakle. Ministar finansija Federacije odgovorio. Zašto to pitanje ovdje nije podjeljeno? Zašto odgovor nije podjeljen? Ja ga dobio kući, a nije došlo u Skupštinu.

Hvala lijepa.

### **Predsjedavajući Skupštine Unsko – sanskog kantona, Admir Hadžipašić:**

Zahvaljujem se. Gospodin Husein Rošić, poslaničko pitanje.

### **Poslanik Husein Rošić:**

Više je komentar na ne dobijanje odgovora na poslaničko pitanje.

Ja znam da smo mi u prošlom mandatu pokrenuli izmjene i dopune Poslovnika o radu Skupštine i još nemamo uopće informaciju dokle je to došlo na Ustavnom sudu. Očigledno je da kada imamo raspravu o dnevnom redu, da one izmjene koje smo mi tada predložili da su opravdane. Ali evo, gospodine Predsjedavajući, ja bih stvarno Vas zamolio da se založite da se taj problem riješi. Naime, ja opet nisam dobio odgovor na svoje poslaničko pitanje koje sam postavio i na prošloj sjednici. A tiče se nostrifikacije diplome Premijera kantona, gospodina Lipovače. Ja nikako ne mogu da razumijem, evo ministra gospodina Jurića, ja Vas molim da mi danas usmeno to odgovorite. Da se skine ta stigma. Dakle, ako postoji problem kod te nostrifikacije, da stignemo tu stigmu i da kažemo evo sve je uredu. Ja sam prošli put tražio odgovor na svoje poslaničko pitanje od gospodina rektora. Evo nisam dobio odgovor ni od gospodina rektora. Ja ga ovaj put pozivam da u skladu sa Zakonom o ustavnom postupku, odnosno upravnom, pardon, sa članom 246, da postupi. Naime, ako postoji i jedan dio nezakonitih odredaba u samom rješenju koje je izdao tadašnji rektor gospodin Karabegović, rektor sadašnji je dužan isto poništiti. I zato ja bih zamolio stvarno gospodina Kamberra da ne napada našeg Premijera što nije na sjednicama. Možda je i ovo razlog. Jer pazite, u pitanju je ipak nostrifikacija magistarske diplome. A šta je onda sa disertacijom?

I naravno, moj drugi komentar. Ja sam dobio odgovor na poslaničko pitanje kada je ponovno imenovan privremeni, dakle na 60 dana. Dakle, mi smo u zadnje vrijeme imali situaciju, imenuje se privremeni upravni odbor na rok od 60 dana, pa se onda opet Odlukom Vlade opet tom istom privremenom upravnom odboru da rok 60 dana. I dobio sam odgovor Sekretara Vlade. Dobio sam odgovor i od gospodina Jurića, koji decidno kaže: Da nadležna Komisija Vlade Unsko – sanskog kantona za izbor ne dostavi prijedloge članova školskih odbora iz reda osnivača, a i ne obavijesti ministarstvo da eventualno nije bilo prijava. I onda ministarstvo, kako bi sistem finkcionirao, je dužno iste donijeti.

- Na osnovu kojeg člana zakona u Vladi i ministarskim imenovanjima vi donosite ovakve odluke? Dakle, tražim decidno odgovor na pitanje, na osnovu kojeg člana?

Ne da se kaže na osnovu Zakona o ministarskim i Vladinim imenovanjima, nego na osnovu kojeg člana? Tačno je da Zakon o ministarskim i Vladinim imenovanjima kaže da se može imenovati

privremeni i upravni odbor na rok od 60 dana. Ali nema ponovnog mandata istom privremenom na 60 dana.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se. Gospodin Kasim Mulalić, poslaničko pitanje.

**Poslanik Kasim Mulalić:**

Gospodo predsjedavajući, kolegice i kolege, članovi Vlade, cijenjeni gosti, sviju selamim i pozdravljam.

Ja imam takođe dva poslanička pitanja. Prvo pitanje upućujem Predsjedniku Skupštine.

- Odnosno tražim od Predsjedavajućeg Skupštine izvještaj o glasanju poslanika na 29. sjednici po 12. tački dnevnog reda, Prijedlog Zaključka o prihvatanju Inicijative za proglašenje javnog interesa za KŠC „Ivan Pavao II – Škola za Europu“.

Naime, poslije 29. sjednice na konferenciji za novinare kantonalnog odbora SDP-a, povjerenik kantonalnog odbora SDP-a je iznio jednu neistinu za koju sam se ja postidio. Kazao je da poslanici Stranke Demokratske Akcije nisu glasali za ovu inicijativu. Ja odgovorno tvrdim, s obzirom da sam bio prisutan, da su svi poslanici Stranke Demokratske Akcije prisutni, glasali za pomenutu inicijativu. I zahvaljujući poslanicima Stranke Demokratske Akcije, ova inicijativa je prihvaćena. S obzirom da smo imali 18 glasova. Premijer vjerovatno ne zna, nije upoznat, ili ga lažu kako funkcioniše ova Skupštinska većina.

Drugo pitanje. Naime, Komisija za pitanje zdravstva, boračka pitanja, rad i socijalnu politiku je na svojoj 24. sjednici donijela Zaključak jedinstven, kojim je tražila od ministarstva za pitanje boraca i ratnih vojnih invalida da dostavi spisak svih korisnika jednokratne novčane pomoći dodijeljene u 2012 godini. Mi smo dobili jedan odgovor gdje ministar za boračka pitanja se poziva na Zakon o zaštiti ličnih podataka. Poslanici su dobili ovaj odgovor.

Ja pitam Predsjedavajućeg Skupštine, rukovodstvo Skupštine:

- Da li je moguće da Skupštinski poslanici ne smiju znati gdje se koriste budžetska sredstva?

Molim pismeni odgovor. Da li mi kao poslanici imamo pravo na informaciju vezanu za trošenje budžetskih sredstava?

Zahvaljujem.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se. Gospodin Damir Hodžić ima poslaničko pitanje.

**Poslanik Damir Hodžić:**

Poštovani Predsjedavajući, zamjenici, Sekretaru, kolegice i kolege zastupnici, ministri u Vladi Unsko - sanskog kantona, predstavnici kantonalnih institucija, mediji, sve vas skupa selamim i pozdravljam.

Moje prvo pitanje upućujem Predsjedavajućem Skupštine i Kolegiju Skupštine Unsko – sanskog kantona:

- Kada će, tražim tačan datum, biti zakazana tematska sjednica Skupštine po pitanju stanja u boračkoj populaciji?

Naime, 16. aprila ove godine koordinacija boračkih udruženja sa područja Unsko – sanskog kantona je sa Predsjedavajućim Skupštine dogovorila da se u ovoj godini održi tematska sjednica Skupštine Unsko – sanskog kantona na kojoj će se iznijeti problemi i pokušati naći određena systemska rješenja za demobilisane borce, ratne vojne invalide, pripadnike šehidskih porodica i dobitnike najviših ratnih priznanja. Takođe smo svjedoci problema u reviziji ratnih vojnih invalida, na šta je ukazao i Kantonalni savez ratnih vojnih invalida svojim dopisom ovoj Skupštini. Mi smo na prošloj sjednici Skupštine donijeli Zaključak koji nas obavezuje da prije donošenja budžeta održimo tematsku sjednicu po ovom pitanju. Zato tražim od Kolegija Skupštine da prije 31.12.2012 godine zakaže tematsku sjednicu Skupštine Unsko – sanskog kantona na kojoj će se razmatrati navedena tematika.

Moje drugo pitanje odnosi se na pitanje, odnosno inicijativu koju sam prije par mjeseci podnio kroz svoje poslaničko pitanje, a kada sam tražio da se sazove sjednica Kluba Bošnjaka u Skupštini Unsko – sanskog kantona, a povodom verbalnih uvreda koje je predsjednica Kluba Srbskog naroda u Domu Naroda Federacije Bosne i Hercegovine, a ujedno i član Skupštine Unsko – sanskog kantona, iznijela na račun delegata Bošnjačkog naroda u Domu Naroda Federacije Bosne i Hercegovine.

- Ponovo od predsjednika Kluba Bošnjaka u Skupštini Unsko – sanskog kantona tražim da se održi sjednica Kluba Bošnjaka u Skupštini Unsko – sanskog kantona i da razmotrimo i očitujemo se po ovom pitanju.

Zahvaljujem.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se. Gospodin Esad Bašević, poslaničko pitanje. Greška. Izvinjavam se. Gospodin Nermin Bećirbegović, poslaničko pitanje.

**Poslanik Nermin Bećirbegović:**

Uvaženi Predsjedavajući, kao i zamjenici, ministri u Vladi Unsko – sanskog kantona, predstavnici medija, drage kolege i kolegice zastupnici.

Ja sam prije dvije Skupštine postavio jedno poslaničko pitanje Vladi Unsko – sanskog kantona. Pošto nisam dobio odgovor, postavljam ga ponovo.

- Da li postoji način da se iznađe mogućnost da se u slijedećoj akademskoj godini izmjesti jedno odjeljenje, da li je to Ekonomski, Pravni, ili Građevinski fakultet, prema Sanskom Mostu?

Čisto zbog blizine i zbog mogućnosti da ti ljudi stižu akademska zvanja malo bliže, nego da moraju svi putovati u Bihać. I druga stvar:

- Da li postoji mogućnost, kao što sam tada pitao, da se dva ministarstva, primjera radi ministarstvo poljoprivrede izmjesti u Cazin, jer je mnogoljudna opština, a ministarstvo privrede u Sanski Most?

I moje drugo, nije poslaničko pitanje, nego je više čestitka.

Ja bih želio ovog puta da čestitam ministarstvu unutrašnjih poslova na čelu sa gospodinom Smlatićem, kao i Federalnom MUP-u i ministru sigurnosti BiH, na uspješno okončanom iznalaženju počinioca teškog krivičnog djela, ubistva Amine Šabanagić u Sanskom Mostu prije osam godina. Doista iskrene čestitke. Jer Sanski Most je grad koji je bio zabrinut zbog te situacije. Osam godina se tapkalo u mjestu. I da se konačno taj problem riješio. Naravno, dolaskom te nove parlamentarne većine i na čelo ministarstva sigurnosti gospodina Radončića, sve je krenulo sa mrtve tačke.

Hvala vam još jednom.

#### **Predsjedavajući Skupštine Unsko – sanskog kantona, Admir Hadžipašić:**

Zahvaljujem se gospodinu Bećirbegoviću. Gospodin Jusuf Bajrektarević ima poslaničko pitanje.

#### **Poslanik Jusuf Bajrektarević:**

Uvažena gospodo, ja ću danas podnijeti jednu lijepu, humanu, inicijativu, korisnu. Na osnovu Poslovnika o radu Skupštine Unsko – sanskog kantona.

- Da na temelju ukazanih potreba i stvarnog stanja na terenu iniciram da Vlada Unsko – sanskog kantona, ministarstvo poljoprivrede, vodoprivrede i šumarstva i druge nadležne institucije kantona i općine Unsko – sanskog kantona, pokrenu proceduru utvrđivanja prava korištenja, odnosno prava upravljanja, ili drugih prava, nad poljoprivrednim parcelama, kako bi naši poljoprivrednici mogli ući u posjed, obrađivati te parcele, jer su im potrebne te parcele za obrađivanje, proširiti svoju poljoprivrednu proizvodnju, a na takav način omogućiti novo zapošljavanje u poljoprivrednoj proizvodnji.

Na ovakav način razgraničiti ko ima kakvo pravo nad poljoprivrednim zemljištima. Vlasništvo je države, ali pravo upravljanja? Negdje ima Agrokomerc, negdje ima neka zadruga koja više i ne postoji. A sve to je smetnja našim poljoprivrednicima da nesmetano uđu u posjed, da obrađuju ove parcele koje su potrebne za obrađivanje. Čak su naši poljoprivrednici spremni i da iskrče, kako da kažem, da parcelu dovedu u namjenu da bude poljoprivredna. Samo da rade. Ali ne mogu, jer im na terenu dođe neko ispred Agrokomerca i kaže: „Mi imamo pravo korištenja“. Ako imaju, onda treba da neki nadležni organ kaže: „Tako je, ima pravo korištenja“. Onda Vlada ne može dati poljoprivredniku. Ne

može na istu parcelu dva lica dovesti u posjed. Ili neka zadruga poljoprivredna se pojavi, da ima ona pravo korištenja i na takav način stvara pometnju na terenu. A ovo bi znatno olakšalo našim poljoprivrednicima da nesmetano obrađuju parcele, da rade i da na ovakav način povećaju proizvodnju i prošire nova radna mjesta. Znači, iniciram da Vlada pokrene ovaj postupak, pred nadležnim organima suda i drugih nadležnih institucija, da se to dovede na čistac, da nema na terenu niko problema, da naši poljoprivrednici budu zadovoljni.

Zahvaljujem.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se gospodinu Bajrektareviću. Gospodin Ekrem Prošić ima poslaničko pitanje.

**Poslanik Ekrem Prošić:**

Dame i gospodo, dragi prijatelji.

Ja bih ovom prilikom želio samo da se pridružim prijedlogu gospodina Nermina Bećirbegovića, oko razmještanja, dislociranja ovih pojedinih fakulteta na područje drugih općina. Pa da malo raja iz Bihaća putuje, ili stanuje u Sanskom Mostu i malo tamo troši, pa ćemo biti bolji. Ili u Cazinu. Samo imam jednu zamjerku. Znači, ne bih se složio s tim da fakultet poljoprivrede bude u Cazinu, ja bih ipak predložio da to ide, u Sanskom Mostu su bolji uslovi za poljoprivrednu proizvodnju. Tamo ima škola srednja. A tamo ipak u Cazinu, pošto smo mi ekspanzija gradnje, a Sanski Most se već izgradio, mi bi tamo da bude fakultet ovaj građevinski koji ima. Mislim da bi bolje odgovaralo.

Hvala.

**Predsjedavajući Skupštine Unsko – sanskog kantona, Admir Hadžipašić:**

Zahvaljujem se gospodinu Prošiću. Nema više poslaničkih pitanja. Zaključujem ovu tačku dnevnog reda. Ako ima potrebe za odgovorima? Ako ne, odgovori će se dostaviti u pisanoj formi. Niko se nije javio da da odgovore. Znači, dobiće te u pisanoj formi. Nije bilo odgovora, da kažete da ste nezadovoljni. Na idućoj sjednici vi iskažite nezadovoljstvo.